

INTERVISTE A MICHELE MORGANTE UN RICERCJADÔR FURLAN AL SCUVIERÇ TE TIERE DAI PARIŞ LIS POTENZIALITÂTS DAL MONT SIENTIFIC



Il professôr Michele Morgante, specializât tal forest, al à fondât un centri di ricercje gjenomiche in Friûl.
di Carlo Morandini

Al è furlan un dai ponts di riferiment mondiâl te gjenomiche. Tal studi de gjenetiche e te valorizzazione de cognossince tal setôr Michele Morgante, che al fâs part de Academie dai Lincei, al à fat un percors formatîf che lu à puartât a lassâ in prin la tiere dai paris, par po tornâ cul obietîf, otignût, di esaltâ lis potenzialitâts sientifichis creant, par esempi, l'Istitût di gjenomiche aplicade. Une realtât dulà che a fasin riferiment realtâts di ricercje di dut il mont. Dilunc di chest percors, par dâ un esempi pratic dongje de nestre realtât, al à realizât dîs vîts une vore resistentis, che a rivin a svilupâsi e a produci uis di cualitât cence nissun sussidi chimic. Vîts e uis sanis, che no patissin i cambiaments dal clime e des stagjons. Un travuart che al è un esempi dai risultâts che, ancje in chest setôr, la ricercje che e fevele par furlan e à rivât a vê a nivel mondiâl. Ancje la formazion e la cressite di Morgante e je esemplâr, come che si lei in cheste interviste, soledut pai zovins, par fâur viodi cemût che si puedin

cjapâ lis ocasions de vite e trasformâlis in moments di cressite interiôr ma no dome. Une carriere, la sô, che si è svilupade in curt, che e à regalât al Friûl une altre des ecelencis de ricercje.

51 agns, zovin pal percors tradizionâl de ricercje in Italie. Ma si pues fâ un balanç de sô carriere...

O ai tacade la mê cariere te ricercje plen di entusiasim e, daspò cuasi trente agns, o crôt che, no cate il timp e lis dificultâts che a son tal fâ ricercje in Italie, chel entusiasim al è restât intat. Fâ ricercje al vûl dî di une bande tant impegn e, di chê altre, tante creativitât e originalitât, ma soledut rigôr e coerence. Bisugne cjâlâ indevant cui voi di un frut, bisugne jessi in stât di valutâ di corse dutis chês ideis gnovis che a vegnin sù tal cjâf o scancelâlis se la prove dai fats o dal resonament no lis ten sù.

O crôt di vê vût cetant tal gno procès formatîf di ricercjadôr dai periodis che o ai passât no intune istituzion academiche, ma ben intune imprese. Une di chês grandis aziendis multinazionâls che si sint a fevelâ mâl, e in chês o ai fat in dut siet agns di ricercje.

Ise une ricete pal sucès?

O ai vût a disposizion risorsis cuasit cence limits par rivâ ai miei obietîfs, che in cualchi maniere a vevin di coincidi cun chei de aziende ma soredu cun chei dai coleghis. E doi di lôr in particolâr mi àn judât a cressi sedi cul lôr esempli pratic (la leadership si le fâs ancje midiant l'esempli) sedi cul fâmi capî che no vevi di sintîmi inferiôr di nissun altri e di no vê pôre di afermâ lis mê opinions o di condividi cun chei altris i risultâts e lis esperiencis. Lavorâ intune industrie mi à ancje insegnât a considerâ il timp une risorse preziose, di no strassâ in riunions che no coventin o in cjacaris, e a savê che, ancje fasint ricercje scientifiche, o varès vût di produsi risultâts in tims definîts e che a podessin coventâ a chei altris.

Ce diferencial la ricercje in Italie?

Dopo un lâ e tornâ tra la Italie e i Stâts Unîts mi soi decidût di inlidrisâmi a Udin tal 2002: l'impad cu la realtât de ricercje taliane nol è stât facil. O confessi di no vê mai vût un rapuart facil cul mont academic talian, dulà che mi soi simpri sintût un forest e trascurât pal fat di no vê vût un santul (o un baron) avonde potent, o pal fat di no jessi di une scuele impuartante. O ai simpri mâl sopuartât il sisteme 'baronâl' talian, dulà che un zovin al à di vivi sot di un paron plui vieli, cence vê pardabon autonomie e indipendece. Cussì o butin vie i agns miôr de vite scientifiche di tancj ricercjadôrs, blocant la lôr pussibilitât di esprimisi propit cuant che a son plui creatîfs e produtîfs

Isal avonde spazi pe ricercje in Friûl?

Lavorâ in Friûl e je stade pardabon une sfide: la Universitât di Udin no je al nivel di altris istituzions forestis, ma nancje di altris talianis. Purpûr chest al è stât ancje un vantaç par me, o ben plui libertât di azion, cence vê pôre di taponâ grancj nons. La creazion dal Istitût di Gjenomiche Aplicade (IGA), insiemi a altris

trê coleghis che a dividin obietîfs e strategjiis te ricercje, al è stât pal sigûr un passaç impuartant te mê cariere in Friûl. Cussì come vê rivât a rindilu, in pôcs agns, un centri di riferiment pe analisi dai gjenomis cu lis tecnologjiis plui modernis di secuenciament e bioinformatichis. Vuê viodi che zovins ricercjadôrs di dute Italie e ancje dal forest a cjalin al IGA come a un puest dulà vignî a vore par podê fâ ricercje a alt nivel e je pal sigûr une grande sodisfazion.

Il compit di un vèr ricercjadôr?

Un aspjet che nol è sempliç, che o ai simpri cirût di tignî in atenzion, al è chel di operâ su doi nivei diferents: sedi publicâ su lis plui preseedis rivistis sientifichis che cirî di spiegâ a lis personis ce che o stin fasint e cemût che chel che o stin fasint al pues vê un impad diret su la lôr vite, e contribuî a migliorânt la cualitât. Il lavôr fat dal IGA no si è tradusût dome in travuarts sientifics, ma ancje in aplicacions concretis de ricercje scientifiche: o vin creât une impuartante realtât industriâl, e di chê altre bande o vin partecipât al progjet impuartant che al à puartât al disvilup di dîs gnovis varietâts di vîts di vin che a resistin ae peronosperie e al oidi.

Publicâ su rivistis une vore preseedis lavôrs che a àn vût ancje tante visibilitât mediatiche mi à dât tante sodisfazion. Ma viodi la int a preseâ i vins vignûts fûr dal lavôr di plui di cuindis agns e je forsit une sodisfazion inmò plui grande.

Tradusi la in vantaçs ricercje pe economie e pe societât?

Un aspjet impuartant al è chel dal capitâl uman e la ricercje di frontiere. o vin di scugnî partî dai centris di ricercje competitîfs a nivel internazionâl, dulà che si fâs ricercje di alt nivel direzude di chei che l'economist talian, docent a Berkeley, Enrico Moretti, al clame star scientists, e che par lui a son un fatôr une vore impuartant pal disvilup economic dai setôrs industriâi a alt nivel tecnologjic.